

芝

園

外

集

芝園外集卷之十七

續說林一

談道林

務玄子退耕于野蓬藿之與居鷄鶩之與游巷無
輪鞅戶無過賓筑筑如也拘虛子過而唁曰若是
乎困也蓋為六合之遊乎曰捐棄人間事我未之
能也然則蓋為竹林之樂乎曰無與為侶也然則
蓋為奕乎曰余懼機心太繁欲樂而益之困也子
亦知夫奕乎奕有所必攻而祥示之以不攻此秦
人遠交近攻之策也有委其小利而易其所大利

此晉人假道伐虢之計也有密裏踈外實而示之以虛此孫臏減竈之術也有張翼自蔽弱而示之以強此道濟量沙之詐也有不救其所攻而攻其所必救此伐蔡退楚之謀也有不襲其所備而襲其所不備此木罌渡水之筭也有以死為生迫而致之戰此淮陰背水之陣也有以退為進誘而使之乘此謝玄淝水之捷也若是乎機心之多也而何樂之能為拘虛子曰子知奕之多機而不知不奕之多機也逢蒙以機而精其射造父以機而良其御公輸以機而擅其巧墨翟以機而固其守宜

僚以機而神其九伯牙以機而妙其琴不惟是也
蒼頡之作書機也大僥之制曆機也臯陶之明刑
機也軒轅之治兵機也后夔之合樂機也伯夷之
興禮機也大禹之平水土機也后稷之播種機也
萬事萬物咸出乎機咸入乎機然則不有忘機者
乎曰漢陰老人非桔槔之機而不知抱甕之亦機
也河上丈人非尚白之機而不知守黑之亦機也
奚獨奕為然哉故曰或作或休與天者游惟玄惟
虛與道為徒惡乎機惡乎無機

人不能皆堯禹也亦不必皆跖屨也堯禹跖屨一

定而不可移者也自餘則可以漸靡而移者也今夫繁弱鉅黍其始則筋膠角幹也入之排檄調其羸詘已而傅之弩矢縱送如意遠發而遠中近發而近中漸靡使然也乘輿之輪山之直木也寘諸槩枯三月五月而不弛其圓中規行乎畏途廣陸敵而不返其初漸靡使然也蘭芷藁本谷澤之殺草也沃之糜醯馨香發聞以易佩玉以匹名馬漸靡使然也干將莫邪鉅闕辟閭其始則赤堇之錫若邪之銅也鍊之以歲月助之以雷公雨師清水淬其鋒越砥礪其喙照人如水切玉如泥陸劇犀

象水斲鯨鯢漸靡使然也惟人亦然漸靡以仁義則仁義漸靡以忠信則忠信漸靡以敬讓則敬讓漸靡以欺詐則欺詐漸靡以淫邪則淫邪漸靡以暴悍則暴悍故小人可以為君子而其不為君子者則以所漸靡非也君子可以為小人而其不為小人者則以所漸靡善也

有為儒生之學者誦說先王哆口談議無天于上無地于下無墮賢于前自以為富貴在躬雖萬乘之尊九土之富莫與易也一日過玄居子而論學焉玄居子曰子常施之于邦國乎曰未也常行之

于鄉黨乎曰未也常修之于家庭乎曰未也曰然則子其宋人乎宋人有游于道得人遺契者歸而歲之密數其齒告隣人曰吾富可待矣夫券富室之所有也財貨之所載也而拾取其遺姓名之不知都邑之不問居止隣証之不察而徒然換之將安取貨哉今子執空言而幾實用侈然自以為無當也則何以異于宋人之寶券者哉

人能克無欲害人之心而仁不可勝用也殘忍勝之則欺孤弱寡以至弑父與君亦將為之矣人能克無穿窬之心而義不可勝用也貪昧勝之則取

非其有以至刼貨盜國亦將為之矣人能克無疾
行先長之心而禮不可勝用也傲惰勝之則少凌
長卑踰尊以至扞臂奪食踰墻樓女亦將為之矣
人能克善善惡惡之心而知不可勝用也偏戾勝
之則好人所惡惡人所好以至庶跖儻而溷隨夷
非周札而譏湯武亦將為之矣夫惻隱也羞惡也
辭讓也是非也人之所必有者也有之斯為人矣
殘忍也貪昧也傲惰也偏戾也人之所本無者也
有之斯為禽獸矣夫皆是人也皆是四端也而若
是其異何也故曰人之所以異於禽獸也者幾希

庶民去之君子存之可不畏哉可不勉哉

人之有是四端也猶其有是四體也四體不備不足以為全人四端不備獨可以為全人乎今夫目之盲也耳之聾也手足之不仁也人之所甚患也盲者不忘視聾者不忘聽痿者不忘起如有能愈之者有不皇皇然求之者乎乃若四端則由我而不由人者也在內而不在外者也省察以心擴克以心涵養以心克治以心求之則是而乃甘於自暴自棄獨何以異於盲者之不甘於盲聾者之不甘於聾痿者之不甘於痿哉

養穀者不在於秀穎而在於根苗然秀穎而不保則併其養根苗者而棄之矣養樹者不在於碩大而在於萌蘖然碩大而不保則併其養萌蘖者而棄之矣養德者不在於考終而在於初始然考終而不保則併其養初始者而棄之矣故果行育德聖學所以成始也敦復無悔聖學所以成終也

富貴貧賤夷狄患難皆天之所命也不可得而易焉者也故貧賤而憂不能易之富貴也夷狄而憂不能易之華夏也患難而憂不能易之平康也是多之乎為憂也多之乎為困也君子知其然故素

位而行不願乎外無入而不自得飯蔬飲水而樂在其中簞瓢陋巷而不改其樂有明徵矣故曰仁者不憂曰君子坦蕩蕩曰君子不憂不懼非漫言之也小人則不然貧賤則憂夷狄則憂患難則憂其於富貴也未得之患得之既得之患失之是無日而不憂也故曰小人長戚戚夫蕩蕩即為君子戚戚即為小人觀於此而上達下達之分可見矣然則君子有終身之憂何與曰憂不如舜而已矣舜飯糗茹草若將終身為天子而衿衣鼓琴若固有之此所謂素位而行者也如舜則無憂矣

易之言龍德而隱也曰不易乎世不成乎名曰遯
世無悶不見是而無悶夫立不立在我者也名不
名在人者也是不是在我者也知不知用不用在
人者也有立而名者矣亦有立而不名者也有是
而知知而用者矣亦有是而不知不用者也一有
成名之心則將易操以殉人其流至於鄉原之闕
然媚世矣一有見知見用之心則將枉道以求合
其流至於鄙夫之患得患失矣故君子之學非惟
忘富貴之為貴而以忘名之為貴名忘然後可以
樂行而憂違矣然後可以確乎不拔矣然後可以

稱龍德矣然則君子疾沒世而名不稱非與曰此
言修其在我者也身修則不稱猶稱也

生生化化無一物而非天也得得失無一物而
非命也有有無無無一物而非神也知天者不競
知命者不憂知神者不惑

觀道者如觀水矣觀水者沼不足而之河河不足
而之江江不足而之海不知水者也觀道者無內
無外無遠無近無我無物故曰君子之道造端乎
夫婦曰堯舜之道孝弟而已矣蓋言一也

求魚於川澤無弗得魚者然而網罟不可廢也求

薪於山林無弗得薪者然而斧斤不可廢也求道
於往聖無弗得道者然而詩書不可廢也故曰學
千古訓乃有獲曰多識前言往行以畜其德此學
者之綱也斧斤也彼以明心見性為致知以六經
為糟粕惑亦甚矣

聽黃鐘之聲而知鼓缶之細也視華袞之文而知
被褐之陋也踐明堂之麗而知環堵之隘也仰聖
人之道德而知小善之不足多也故治必稱堯舜
非是則小康也功必稱湯武非是則五伯也道必
稱周孔非是則俗儒也文必稱六經非是則莊荀

也

珠不能無礫而良工能去其礫玉不能無瑕而良工能治其瑕人性不能無駁而善學者能攻其駁迨夫珠玉之純也孰知其有礫與瑕哉人性之純也孰知其有駁哉然而治珠玉者求之珠玉而已矣治性者求之已而已矣見人而不自見者謂之矇聞人而不自聞者謂之聵慮人而不自慮者謂之瞽惡乎足以治性哉故君子之學也立必參前言不下帶書與之遊夜與之息知身之有得失而不知人之有毀譽求諸己之謂也小人之學也朝

為而夕求其成坐施而立望其報行一日之善而
求終身之譽求諸人之謂也求諸己者猶長日加
益而不自知也求諸人者猶鑊冰以為玉而終於
無成也

衡岱不言高而人莫不以為高江海不言廣而人
莫不以為廣金石不言堅剛而人莫不以為堅剛
有其實也楮舟之綵繪華矣而人不以之浮水木
果之雕鏤肖矣而人不以之充飼無其實也故善
亦以實不善亦以實舜之在鄉黨也非家饋而戶
贈之也人莫不稱善馬象之在鄉黨也非家奪而

戶掠之也人莫不稱惡焉是人之見譽也非必有私愛也惟其公而已矣其見謗也非必有私惡也亦惟其公而已矣君子以人之謗譽為己之得失其謗其譽皆吾身之鑒也故恥其面之不及子都也則以銅鑿取其行之不及堯舜也則以人鑒鑿銅者修其容鑿人者修其德

凡人之所務務於外君子之所務務於內故明如離婁聰如師曠勇如賁育知如樛里皆非君子之所貴也君子所貴於明者為其足以見道也不離貴可也所貴於聰者為其足以聽德也不師曠可

也所貴於勇者為其足以行義也不貴育可也所
貴於知者為其足以辨惑也不樗里可也

或疑致中和而天地位萬物育其可以必驗乎曰
非驗之天地萬物也非驗之時與位也驗之吾心
而已蓋天地萬物同一中和也吾能致其中和則
天地得其所以為天地有不位者乎萬物得其所
以為萬物有不育者乎是吾與天地萬物渾合無
間者也何弗驗也故曰能盡其性則可以盡人物
之性而與天地參又曰以直養而無害則塞乎天
地之間此之謂也後儒有言一念之善即景星慶

雲一念之不善即妖狐厲鬼又曰幽暗巖崖生鬼
魅清平郊野見鸞皇蓋亦有見於此矣

古之為道學者難今之為道學者易或曰何謂也
曰古之道學言孝而必為孝言悌而必為悌言忠
信而必為忠信言廉潔而必為廉潔知之斯言之
言之斯行之行之斯守之是以難也今之道學其
口克舜也其行桀紂也其口隨夷也其行盜跖也
侈論竝議欲以一朝駕軼流輩退省其私則饕餮
可也淫污可也請寄以取貨可也佞諛以干進可
也誑人曰吾存吾心而已矣斯不亦易乎

瘧瘵者痛為其可以已病也故鍼石不辭焉飲藥者苦為其可以活命也故瞑眩不辭焉為痛苦之故而不瘧瘵飲藥也則身不活而病不已矣學者之去惡亦猶是也省察不周則不去創艾不深則不去克治不勇則不去操持不力則不去是亦鍼石與瞑眩之類也

鵠之白也吾謂之白人皆以為白也若謂之黑人不黑也即親昵者和之餘則否矣冰之寒也吾謂之寒人皆以為寒也若謂之熱人不熱也即親昵者和之餘則否矣夫一人之口難與天下之口爭

也若口之所是必公是也則天下之口莫不以為是矣口之所非必公非也則天下之口莫不以為非矣此不爭之爭也彼以貪為廉以汙為潔以譎為信以佞為忠以暴為仁以枉為直孰信哉

生人之品有三上知也下愚也中人也上知與下愚不移中人之性則可導而上下者也導之則莫大於教化荀仲豫曰教化之廢推中人而墜於小人之域教化之行引中人而納於君子之途故契之司教與后稷並命周官六典司徒居其一焉是聖王重之也

哀莫哀於心死而身死不與焉然身之死也人莫
不哀而心之死也則莫之知哀也可悲之甚也是
故事親不孝心之死也事君不忠心之死也兄弟
不親心之死也妻子不刑心之死也取予不慎心
之死也進退無禮心之死也威儀不肅心之死也
語言無章心之死也是皆有道者之所哀也

孔子曰君子有三思少而不學長無能也老而不
教死無思也有而不施窮無與也是故君子少思
長則學老思死則教有思窮則施石谷子曰孔子
之言蓋舉其端言之也非以盡人理也君子安則

思其危勿之敢肆也達則思其窮勿之敢驕也壯則思其衰勿之敢怠也寵則思其替勿之敢恃也羸則思其誦勿之敢侈也始則思其終勿之敢忽也言則思其踐勿之敢易也友則思其益勿之敢濫也業則思其繼勿之敢苟也夫無弗思也無弗慎也而後可以寡過矣夫然後君子之事畢矣夫行而不止駑駘可以及騏驥止而不行夸父不可以越侏儒故士之為學惟在不止矣壯而不止少者莫能踰也老而不止壯者莫能踰也故必為常成必行常至未有不然者也百川學海而卒至

於海不已者也行邁屢稅胡能有迄不可已而已者也

或問知之與行合一乎曰未始不合一也不行不足以為知然則無先後乎曰未嘗無先後也不知則不能行故行而不問途未有不迷者也涉而不察表未有不溺者也農而不問于農師未有能善稼者也工而不問于工師未有能善器者也今夫邪正曲直學之途也淺深廣狹學之表也詩書六藝學之先師也哲人修士學之良工也問之斯知之知之斯行之則其知也為真知其行也為善行

夫是之謂合一而君子之學成矣如摘埴而索途
猶之不問途也臨海而望洋猶之不察表也守一
而執虛師心而自用猶之不求師也欲學之無僻
得乎

商人之於貨也其利倍屨也則走而之國都離鄉
去井無虞也其利什百也則走而之四方關梁盜
賊無虞也其利千萬也則走而之蠻夷異言異服
無虞也士人之修道也可以動天地可以格鬼神
可以正家善俗可以定國謀王其為利也豈直十
百千萬而已哉又况無奔走道路之勞無關梁盜

賊之患無異言異服之憂而卒莫之能力也則何智之不如商人哉

一端之錦以易十疋之練可乎曰不可一升之珠以易十斛之粟可乎曰不可一鈞之金以易十鈞之鐵可乎曰不可夫所以不可者何也曰其數則倍蓰也其直則千百也以所至貴易所至賤而惟多寡之為較雖甚愚不為也今人之有身也可以參三才可以繼往聖其為至貴也非寶物之可倫儼也而乃窺倖門嗅芳餌希唾餘之恩澤以飶軒冕之榮則何以異於貿物者哉

生金者山而鑿山者以金生蠹者木而食木者以蠹生事者人而賊人者以事故一時無事則一時之生意也一日無事則一日之生意也老氏之致虛守靜其以是乎

腰萬金之璧者不以賈溟渤之波挾隋侯之珠者不以彈千仞之雀何則所用者重而所以要者輕也夫人之有身也備五德而參三才不啻萬金之璧而隋侯之珠也富貴利達則身外之物亦溟渤之賈與千仞之雀也棄生以殉物憂患煎其內危禍迫於前而莫之知止也豈不悲哉

人之有是心也猶其有是身也身非食不生故欲食滋味所以養身也心非善不生故存養省察所以養心也然人知身之當養也可欲之物無弗致也一日不再食則皇皇矣至於心而不知所以養之者其存其亡曾莫之恤也斯不亦大蔽乎今夫魚非水不生一日而無水則餒矣木非土不生一日而無土則槁矣夫物之死也人莫不知之也而心之死也則不自知也可悲之甚也故君子之學在不息不息于學者不死其心之謂也昔子貢倦于學而欲息問于孔子孔子曰事君非所息也事

親非所息也妻子非所息也朋友非所息也耕亦非所息也必也其死乎望其壙皐如也嗔如也隔如也此則有所息矣故曰仁以為己任死而後已不息於學之謂也

大學非佔畢之謂也所貴在於明道也仕非爵祿之謂也所貴在於澤物也博文約禮所以明道也論道經邦所以澤物也學而不能明道塗車芻靈也仕而不能澤物鶴軒猴冠也

龍門子曰科舉之文興天下無文辭矣孝悌之名聞天下無善俗矣循廉之行著天下無良吏矣貞

操之事彰天下無烈婦矣記誦之習勝天下無真
儒矣穿鑿之學多天下無六經矣忠直之行顯天
下無全節矣是皆衰代事也以今觀之抑又有甚
者焉記誦科舉之文天下無經傳矣賄進司牧之
吏天下無循良矣賂水旌表之典天下無貞節矣
貨鬻銘志之文天下無實錄矣空談致良知之說
天下無道學矣

鄧林之野難乎其為木然而求明堂之棟亦不皆
中也崑崙之墟難乎其為玉然而求連城之壁亦
不多良也聖明之世難乎其為才然而求伊傅周

召亦不盡然也大聖之口難乎其為賢然而求顏
曾閔冉亦不多得也苟足任梁棟不必鄧林也足
備瑚璉不必崑崙也足司經濟不必治朝也足傳
正學不必聖門也是以君子貴自勉

蠶者之志於得絲也耕者之志於得穀也學者之
志於得道也其心一也然蠶有勤惰而得絲有厚
薄不盡廢糸也耕有勤惰而得穀有多寡不盡廢
田也惟學而不力則終於無成而前功盡棄矣是
以君子有終身之憂

有人於此示之黑則黑示之白則白不相亂也日

之病也火攻其內醫障其外神爽眩惑五色在前
不復能別矣有人於此食之甘則甘食之苦則苦
不相誦也身之病也惡寒發熱五臟反覆五味在
前不復能辨矣有人於此語之是則是語之非則
非不相錯也心之病也狂惑昏瞽好惡易位是非
在前不復能判矣然目與身之病也人皆知惡之
療之至於病心而不知所以療之弗思甚矣

以清水而投於溷濁則易以溷濁而澄為清水則
難以良金而淆於銅錫則易以銅錫而汰為良金
則難以素絲而染於雜色則易以雜色而濯為素

卷之十七
絲則難以美質而壞於情欲則易以情欲而復於
美質則難是以君子慎其初也

凡人之情莫不好善也亦莫不惡惡也反是則習
蔽之也然而有可變者有不可變者學楊則楊學
墨則墨學孔則孔此其可變者也堯舜不能得之
於子逢干不能得之於君宜曰申生不能得之於
父周公不能得之於管蔡此其不可變者也今夫
厲天下之大惡也夜半生子遽取火而視之汲汲
然惟恐其似已也夫厲猶惡其為厲也而况其他
乎如推其取火之情而返之則人皆可以為善矣

又何朱均管蔡之有哉

芝園外集卷之十八

續說林二

明志林

凡物莫不有積也積土而為山積水而為海此以積甦萬物者也積雛鯨而為鷗鵬積萌蘗而為杞梓此以積長萬類者也積月而為歲積歲而為世此以積表歷年者也積耕耨而為農夫積斲削而為工匠積貨賈而為商賈此以積成業者也居楚而楚居越而越居齊魯而齊魯此以積成習者也至於學而可不知積乎故塗人積而士士積而賢

賢積而聖身積而家家積而國國積而天下一言
不如堯舜弗已也一行不如堯舜弗已也一息不
如堯舜弗已也夫然後可以踐形可以復性可以
通神明可以贊化育而學之能事畢矣

相高下視境肥序五種君子不如農人然而農人
不得其不安其家通財貨相美惡辨貴賤君子不如
賈人然而賈人不得其不安其肆設規矩陳繩墨便
備用君子不如工人然而工人不得其不安其業故
君子也者無詔告之煩而童耄莫不喻焉無甲兵
之威而強虜莫不馴焉無百金之產而人莫不推

富焉無一命之榮而人莫不推貴焉無矯俗之行
而人莫不推名焉是古之君子也施敬而人莫之
敬也施德而人莫之德也施信而人莫之信也立
節而人不以為節也達治而人不以為達也是今
之君子也治以君子亂以君子遇以君子不遇以
君子是君子之所守也

東門吳與田無擇同里而產一日東門吳應材官
之募而歸揚揚然自得也遇田無擇於田間鶉衣
百結驅羸犢而耕謂之曰吾身長八尺腰盈十有
二圍食盡一石力挽千鈞之弩手折國門之楨走

及犇牛一國之人讓勇馬而子乃身不勝衣步不
越坎見豺豕而慄聞猿狖而驚若是其怯乎田無
擇曰奚然哉子不聞孔子之語子路乎夫水行不
避蛟龍者漁父之勇也陸行不避兕虎者獵夫之
勇也白刃交於前視死若生者烈士之勇也知窮
乏有命知通之有時臨大難而不懼者聖人之勇
也吾方學聖人之勇而未得心竊慙焉若夫長不
肥碩嚼粟挽強牛馬之鬪捷而市人之爭長又何
足以掛齒頰哉

公儀伯以力聞諸侯堂谿公言之於周宣王王備

禮以聘之至則懦夫也宣王疑而問焉曰汝之力
何如公儀伯曰臣之力能折春螽之股堪秋蟬之
翼王作色曰吾之力者能裂犀兕之革曳九牛之
尾猶憾其弱也汝折春螽之股堪秋蟬之翼而力
聞天下何也公儀伯曰善哉王之間也臣之師有
高丘子者力無敵於天下而六親不知以未嘗用
其力故也臣以死事之乃告臣曰人欲見其所不
見視人所不窺欲得其所不得修人所不為故學
恥者先見輿新學聰者先聞撞鐘夫有易於內者
無難於外故名不出其一家今臣之名聞於諸侯

是臣違師之教顯臣之能者也然則臣之名不以
負其力者也以能用其力者也玄石子曰公儀伯
其知道乎老子曰良賈深藏若虛君子盛德容貌
若愚言不眩於外也反是鮮不禍矣故國武子之
死死於名也韓非之死死於術也荆軻聶政之死
死於勇也衛鞅李斯之死死於權也吳起之死死
於善戰也是皆不聞公儀伯之義者也是皆自顯
其能者也

務虛子身處環堵而鈞聲六合飾詐以為智眩奇
以為能欲盡籠一世之人而人莫之與也以語希

玄子曰夫餌香也而魚集焉叢茂也而禽聚焉德厚也而人附焉今余之德非涼也親人而人莫之親也敬人而人莫之敬也我之於人也皇皇而人之於我子子也子其弔我希玄子曰子欲弔乎吾今為子賀矣務虛子曰何賀曰昔子列子之齊中道而返遇伯昏瞽人伯昏瞽人曰奚方而返曰吾驚焉吾食於十漿而五漿先饋夫內誠不鮮以外鎮人心此吾之所為患也夫漿人之為利也薄其為權也輕而猶若是而况萬乘之主身勞於國而智盡於事彼將任我以事而效我以功吾是以驚

夫列子以人之親敬為患而子以人之不親敬為
患賀不亦宜乎

農一也種稷而得稷種黍而得黍成也其志也織
一也織繒而得繒織錦而得錦成也其志也冶一
也鑄罇而得罇鑄釜而得釜成也其志也士人之
於行也希跖而得跖希舜而得舜成也其志也若
種稷也而欲其成之為黍也織繒也而欲其成之
為錦也鑄罇也而欲其成之為釜也未之有也實
之為跖也而欲其名之為舜也亦未之有也
君子者治人者也非治於人者也糾人者也非糾

於人者也然治人之亂必先自治糾人之曲必先
自直故正身修德不可不先也公輸之用規矩也
必有所以先於規矩者也后羿之用弓矢也必有
所以先於弓矢者也造父之用轡策也必有所以
先於轡策者也君子之平章天下也必有所以先
於平章者也世有不修其德而欲以致用是猶以
破釜煮糜難乎其無漏也以楮舟浮水難乎其不
敗也近小者尚不能濟况遠大乎

處治世惟恐其不智也處濁世惟恐其不愚也治
世而智也辨是非明好惡出則正朝廷樹勛伐處

則厚人倫美風俗中外以為儀表後學以為菁蔡
豈非君子之所貴哉濁世而智也則一白衆緇一
齊衆楚言而莫予信也行而莫予從也徒見夫舉
錯之混淆可忿也綱紀之廢壞可忿也是非之顛
倒可忿也士習之澆漓可忿也風俗之薄惡可忿
也官司之貪殘可忿也豪強之橫賦可忿也日接
於前無一可以當意耳之聰也目之明也心之靈
也皆所以自困也何用是皎皎為哉乃知鮑焦抱
石屈平懷沙阮籍沉酣以自放淵明縱酒以樂生
非得已也如其愚也玉石之不分雌雄之莫辨鳩

居以為安藿食以為餉不猶愈於寸丹自焚者哉

買玉者以輕重為價以其治之也琢之磨之屑而

棄之十損二三焉非不愛玉也為不中於器也買

木者以長短大小為價以既其治之也斤之斧之矩

之規之十損四五焉非不愛木也為不中於室也

士人之於文也燕綜曲興墳飭化子史盡天下之美

麗矣然而體不適則修體意不適則修意詞不適

則修詞字不適則修字始之所構中而去五之一

焉中之所裁終而去三之一焉非不愛文也為不

中於程也若愛玉而不琢不善治王者也愛木而

不斲不善治室者也為文而不修飾不善為文者也

無競氏早謝職事退耕東海之上施舍已責赴人之急歲租之入衡量必平儉歲則弛以予人或問之曰今之勢家瘠人以肥己者皆是也子何獨異焉無競氏曰子亦知大織乎夫織累絲而寸累寸而尺累尺而丈累丈而疋然後織斯成焉積善與積利亦猶之矣竭智思握竒贏利在傭佃則剝傭佃利在商賈則剝商賈利在里閭則剝里閭利在骨肉則剝骨肉孜孜如不及也利之盈也儲之以

蓋蔽衛之以垣墉固之以柝鑼捍之以僮奴不啻
足矣乃水火盜賊之虞官司之貪暴子孫之驕奢
破蕩不有可患者乎飽而知人之饑溫而知人之
寒逸而知人之勞周窮恤匱弔死閔生平出納慎
取予篤人倫遠回慝亦孜孜如不及也善之積也
不以蓋蔽而豐不以垣墉而衛不以柝鑼而固不
以僮奴而守雖有意外之患君子不患矣夫人之
情莫不念其子孫也積利與積善皆以貽之也貽
之以危孰與貽之以安貽之以不可保孰與貽之
以可保貽之於昭昭孰與貽之於冥冥今以予之

世臣夕集卷之十一
不穀而欲效彼紛紛者之所為是重貽子孫之患也故不為也

十人樹柳不若一人仆之之速也百夫障隄不若蟻穴潰之之速也累世造家不若驕子覆之之速也終身修善不若妄念敗之之速也故禦患者甚於禦寇而保終者難於捧盈

采菽子號於途曰欲貴者視予欲富者視予欲安逸者視予人曰子之貴富安逸何在哉而言若是無乃為誕乎采菽子曰予之貴非人爵也富非人祿也安逸非人假之也日月星辰吾之冠冕也藜

杖芒屨吾之安車也山林泉石吾之堤封也華岳
河海吾之爵號也孰貴是者哉竹樹以為廡室草
木以為衣裳魚鳥以為錢貨藥物以為膏粱孰富
是者哉近無耳目之營遠無經綸之慮處無將送
之勞出無顛沛之患孰安逸是者哉且貴者不能
分人以爵而予之貴人人可同也富者不能分人
以祿而予之富人人可同也安逸者不能與人共
而予之安逸人人可同也然則子何以為誕哉
絲之成也或為締繒或為錦縠或為裳衣或為黼
黻然皆出於蠶也故君子慎所以售之者木之材

也或為明堂或為華屋或為曲室或為廁溷然皆
生於山也故君子慎所以用之者

直木無陰非無陰也而陰者寡直士無徒非無徒
也而合者寡故有高世之名者必有負俗之累有
絕群之節者必嬰謗訕之患以周公孔子之聖而
猶不得免焉况餘人乎亢節厲行而求容於濁亂
之世難矣是以君子貴自信

衣華服者不憇於泥途享美饌者不貯於汙噐以
有所愛也吾身之貴豈特華服美饌而已哉而泥
途汙噐莫之擇也可謂智乎

越人養女而美甚憐愛之長當家矣媒妁紛如也
其父曰家族不良者弗字形容弗姣者弗字貲產
弗豐者弗字多兄弟者弗字少倚庇者弗字必欲
其女之得所也其自謀身也則不然意所欲為則
為之所欲至則至之刑僂在前而不知也訕毀在
側而不恤也則何以異於愛女哉

或謂墨子曰今天下莫為義子獨自苦而為義不
如已也墨子曰有人於此有子十人一人耕而九
人處則耕者不可以不益力也何則食者衆而耕
者寡也今天下莫為義則我愈不可以不力也何

可止哉是故家多不義則力義於家者不可不汲汲也國多不義則力義於國者不可不汲汲也天下多不義則力義於天下者不可不汲汲也是猶奔流之砥柱敗軍之後殿也可但已乎

聞官清醜女貞非必其性之能潔也要而不貪美而不瀆潔斯信矣窈人儉賤人恭非必其性之能約也富而不侈貴而不驕約斯信矣見勢而詘見才而遜非必其性之能下人也有而若無實而若虛謙斯信矣

心一也善養之可以治四海不善養無以理家庭

善養之可以參天地不善養無以御妻子善養之
可以名後世不善養無以裕朝夕夫心吾心也養
之者亦吾心也得亦在我失亦在我方寸之微而
天壤判焉曾是可以弗念乎

世無自直之箭而射者不窮於箭斲削之工多也
世無自圜之木而乘車者不乏於輪槩括之工多
也若必恃自直之箭則百世無矢矣即有之奚能
適於遠近疾徐之宜乎必恃自圜之木則百世無
輪矣即有之奚能合於整控馳驟之節乎故君子
之養性也不恃其直也恃吾有以直之也不恃其

園也恃吾有以園之也故曰氣質之用小學問之
功大

君子之好生也為其可以修善也有一日之生則
益一日之善也有一歲之生則益一歲之善也死
則止矣是故以生為寶也小人之好生也為其可
以規利也有一日之生則益一日之利也有一歲
之生則益一歲之利也死則止矣是故亦以生為
寶也然君子之修善也不求人知而求天知不求
同俗而求同理衆未必與也而君子不悔也小人
之規利也產業日益之豐居積日益之富衆莫不

羨也而君子不羨也

澤多罾而魚驚不育山多斧而樹木不蕃井多繙而水泉不息是以君子貴於節也有國而不節則危其國有家而不節則破其家有身而不節則亡其身養聰明者節視聽防疾病者節飲食遠過尤者節語言

寶猶形也名猶影也實猶膏也名猶光也形立而影生焉若覓影於空不可得也膏凝而光生焉若求光於塊不可得也故重華文命非踐九五而後人知其聖也孔丘孟軻非聚徒談道而後人知其

學也比干子胥非剖心刳眼而後人知其忠也伯夷叔齊非餓死首陽而後人知其廉也

或謂玄冥子曰世人皆競富貴而子獨否將無不近于人情乎玄冥子曰非然也有語於人者曰斷汝之首以易冠則將為之乎曰否夫首所以冠之也而首之斷則奚以冠為也曰則汝之足以易履則將為之乎曰否夫足所以履之也而足之則則奚以履為也今夫身者所以享富貴也狐卿之尊金玉之羨人情孰不欲之乎世之敝也機阱在前鼎鑊在後朝遊暮鬼莫之能必也而冒昧以求之

則何以異於斷首以易冠則足以易履者哉

鐘不可以無槌鳴弓不可以無弦射魚不可以無

餌釣獸不可以徒手搏是故致用者當先修其具

禾不可以石田生龍不可以盆水畜舟不可以均

堂沉鼎不可以尺組引是故任重者當先厚其德

支離䟽者願隱於臍肩高於頂會撮指天五管在

上兩胛為脇挫鍼治緝足以餽口鼓箠播精足以

食十人上徵武士則支離攘臂於其間上有大役

則支離以有常疾不受功上與病者粟則受三鍾

與十束薪夫支離其形者猶足以養其身終其天

年又况支離其德者乎玄冥子曰甚矣莊生之誕也夫人生而有形小不適謂之疾大不適謂之廢甚不適謂之篤廢篤廢之人天之棄也乃若耳目聰明四肢康豫入以事其父兄出以事其長上達則樹彛鼎之勲窮則修耕稼之業豈非人情之所願欲哉而奚以支離為幸也夫支離其形且猶不可而况支離其德乎然則彌綸天地經緯百物繼往開來又孰從而為之甚矣莊生之誕也

或謂拘虛子曰子之少也播魁譽於一方其壯也揚景業於四國布列者推其表樹摛詞者遜其文

章何未老而懸輿一斥而不復里黨有爭席之人
公卿無推轂之舉意者亮飾之不終耶智慮之早
衰耶抑始者之矯飾耶不然何落落若是拘虛子
曰子不聞乎亢高世之行者有負俗之累甘獨寐
之適者多拂衆之操蓋自古然已且士有直道而
三黜有巧奏而封侯有萬言而被擯有一言而相
君亦各因其時也子不見夫騰猿乎其得柹梓豫
章也攬蔓其枝而王長其間雖羿逢蒙不能眇睨
也及其得柘棘枳枸之間也危行側視振動悼慄
此筋骨非有加急而不柔也處勢不便未足以逞

其能也故苟遭其時則灌木之猿也其失時則枳
棘之猿也又何疑於余乎或曰然則子無戚乎曰
昔孫叔敖三為令尹而不喜三去之而無憂色以
為其來不可却也其去不可止也其得其失非我
也且不知其在彼乎在我乎其在彼耶亡乎我在
我耶亡乎彼何暇計乎人貴人賤哉余方以叔敖
為師不知其他矣

荀卿曰仁義禮善之於人也辟之若貨財粟米之
於家也多有之者富少有之者貧至無有者窮故
大者不能小者不為是棄國捐身之道也今夫人

之於貨財也銖銖而積之為其無以給用也人之
於粟米也銖銖而積之為其無以資養也甚者謀
其身矣又及其子謀其子矣又及其孫日孜孜而
不已也至於仁義禮善以親父子以和長幼以睦
隣里以治內外以續祖先以式後裔有之則安無
之則危有之則生無之則死乃棄而不求求而不
力則何以異於貨財粟米哉

覆行者能無為奸不能使狗不吠已處亂世者能
無為不善不能使人不謗已

人有中酒者五臟易位五官失職困劇瞽亂不能

自存憤而欲自沉也其妻止之曰無庸後此不為則已矣今病且愈其人從妻之言終歲不親杯酌見酒肆則趨而過之日之久也從而小酌焉已而大酌焉已而縱飲如故卒病酒以死有婦人焉以淫受辱不勝恚恨掩其室而自經其鄰之婦曰命可惜也後此不為則已矣乃閉門塞竇足不踐于庭一日見所私者過於前不覺淫心之復萌也呼而嬖之不足而又及其他卒病淫以死今人之有過非若淫酗之耽也知之即悔焉悔之即改焉非若淫酗之不可懲也而淫縱其欲肆行無忌明知

其非而竟自踐之惡積而不可掩罪大而不可解
甚則亡其國家小則陷于刑戮亦何以異于淫陷
者哉

芝園外集卷之十九

續說林三

瑣弋林

有求不死之術者寢跡于草野寄傲於靈臯遨遊
方岳歷覽瀛洲窮槩神之壑掘產秀之丘飡雲霞
而偃仰吸沆瀣而吐精被羽服而履赤烏鍊丹藥
而談真經自以為赤松王喬之屬安期羨門之倫
天子不能爵諸侯不能祿趨而事之者若扳軒轅
之逸駕而徼彭祖之遐福也有儒生知其誕也喻
使改業焉道者曰子以仁義為桎梏以禮樂為圖

圖以名利為戰鬪之場以婚姻死喪為人鬼之役
奚智奚愚罔不沒溺子不知子之誕而誕我乎儒
者曰子來前吾語子夫虺面癯形飲水食草窟穴
為室木葉為衣雖窶夫乞子不涼於此矣不囹圄
而拘不桎梏而繫閉目而息面壁而寂滅如死灰
索如稿木雖胥靡繫囚不困於此矣遠族類棄輩
儔無父母之親無妻子之養無交游之狎念至不
能陳其詞疾苦不能通其意雖畸人亡命不榮於
此矣五色不得娛于目五音不得悅于耳五味不
得適于口絲枲不得蔽于骸情兵慾火鑿而復集

雖卧薪嘗膽不苦於此矣子亦何利而為之道者
曰子謂涼者涼乎亦不涼者涼乎困者困乎亦不
困者困乎斃者斃乎亦不斃者斃乎苦者苦乎亦
不苦者苦乎人各有心子行子之志吾亦行子之
志而已已而儒者不遇于時坎壈終身乃曰昔者
道士之言有旨哉

或問於唐文宗曰烏獲與焦僥搏則君以為孰勝
曰烏獲勝夸父與跛夫馳則君以為孰捷曰夸父
捷逢蒙與戚施射則君以為孰中曰逢蒙中離婁
與眇子視則君以為孰察曰離婁察曰然則君之

任人不如其所以論事者矣李訓鄭注此所謂乳
臭兒也德不足以論道經邦才不足以定傾持危
望不足以辟邪禁虺智不足以別嫌明微翼而植
之猶懼其仆也而乃托之為股肱委之以心膂欲
以除螻蛄之疾而剪城社之殃是猶以僬僂與烏
獲相搏跛夫與夸父並馳戚施較射于逢蒙而眇
子爭明于離婁也罔不敗矣君其改圖焉文宗不
聽未幾乃有甘露之禍

客有見相國者歷咨經綸之策客曰嘗聞之為政
在人亦旁求天下之士而已矣相國曰固求之其

如士之不至何客曰天下未嘗無士殆求之非其人也昔淳于髡一日而見七士於齊宣王王曰寡人聞之千里而一士是比肩而立也百世而一聖是隨踵而至也今子一朝而見七士則士不亦衆乎淳于髡曰不然夫鳥同翼者而聚居獸同足者而俱行今求柴胡桔梗於沮澤則累世不得一馬及之畢叅梁父之陰則却車而載耳夫物各有疇今髡賢者之儔也王求士於髡若挹水於河而取火於燧也髡將復見之豈特七士也今求士而未至則其所以求之者非也雖然愚又有效焉求士

於髡則所得皆髡也若求士於伊傅則所得皆伊
傅也求士於隨夷則所得皆隨夷也求士於魯閔
則所得皆魯閔也故吾願相國之善求之也

魏王與龍陽君共船而釣龍陽君得十餘魚而涕
下王曰有所不安乎何不相告也對曰臣無敢不
安也臣為臣之所得魚也王曰何謂也對曰臣之
始得魚也臣甚喜後得又益大臣直欲棄前之所
得魚矣今以臣之惡而得為王拂枕席爵至人君
走人於庭辟人於途四海之內美人亦甚多矣聞
臣之得幸於王也必褰裳而趨王臣亦猶臣曩前

之所得魚也亦將棄矣臣安得無淚出乎穆卜子
曰斯龍陽君之憂也亦人情之所共患也故貴而
易交非其信之不固也富而易妻非其愛之不篤
也啖梁肉者棄粗糲被綺縠者棄布帛簷華榱者
棄陋室御文駟者棄駑駘豈獨龍陽君之魚哉

顏率見公仲公仲不見顏率謂公仲之謁者曰公
仲必以率為佯也故不見率也公仲好內率曰好
士公仲嗇於財率曰散施公仲無行率曰好義自
今以來率且正言之而已矣謁者以告公仲遽起
而見之石奚子曰今之鄉相其不為公仲者鮮矣

簠簠不飭而諛之為廉潔惟薄不修而諛之為貞
嚴引用朋黨而諛之為好士擯棄賢良而諛之為
忠謹詐諉而諛之為誠信脂韋而諛之為正直陰
狡而諛之為含洪狠賊而諛之為仁厚若是者進
而加諸膝否則推而納諸淵又何怪乎顏率之欲
改口也

荆襄之間多盜有劇盜者日聚徒黨而肆之踰垣
升屋出入竄伏罔弗習也其人則美衣冠從僮奴
華韉駿馬日游行都市以偵人之虛實有所欲盜
則先就其僧舍之近者而假宿焉盛酒饌以燕其

徒黨若貴游公子然者陰部分其人酌道里計漏刻以往已乃自行援接燈火前導衣冠騎乘儼如也追捕者至則佯為逐賊者給曰賊在近可亟追也乃指東易西迷其所往萬一及之則挺刃以鬪奪而篡之久之居積日富百物備具衆往往物色之或舉以訟官錢神方靈居解者衆出其貨則曰此吾家固有之物耳驗之果合訟者莫能明也反坐誣盜之罪以退其人益肆惡無忌而輒盜藩王之宮藩王踪跡得實聚衆而捕之凡所盜珠玉之器龍鳳之衣皆非民間所有始無以自解而亡盜

者益群而訟之乃伏其辜而盡捕其徒黨斃之國
棘夫盜也者天下之劇惡也令甲非不嚴也乃其
人得以詐偽之故而後其刑誅彼有假美名以誣
世作奸者亦何以異於是哉

余嘗與涇野子論政涇野子曰政在任人而已何

言乎任人也昔吾之家為也隣之人有五子焉一

子樸一子敏一子矇一子僂一子跛乃使樸者農

敏者賈矇者卜僂者鍛跛者績五子者皆不患於

衣食焉使各易其業則不免於凍餒矣故曰尺有

所短寸有所長用其所長而畧其所短則天下無

棄才矣苟舍其所能而強其所不能是猶以盜驪捕鼠而以純鈞刈草也庸濟乎

虎之處于山也無弗威也虞人得而檻之則犬豕侮之矣龍之處于淵也無弗神也蕩而失水則螭蟪戲之矣君子得其時則龍虎之神威也不得其時其不為犬豕螭蟪之所凌者鮮矣然檻者不可謂之非虎也失水者不可謂之非龍也不得時者不可謂之非君子也

家有火起而牛逸於闌救火而不追牛非不愛牛也為其時有所急也兒子腰千金之寶而溺於海

痛子而不彌寶非不愛寶也為其情有所重也服
牛死夫婦哭非骨肉之愛也為其有所利之也隣
人天雨而覆其屋信之而不傷非屋不足惜也為
其無所利之也

藜藿不糝不望梁肉桓楬不完不慕文繡以非其
享也重寶懸於市而目不眴駟馬過於前而心不
羨以非其分也治百畝之田者期於大穫行千金
之賈者志于罔利以有其具也侍君王之側而欲
得其政處妃嬪之位而欲私其寵以有其地也
漁之夢江湖也樵之夢山谷也獵之夢狐兔也耕

之夢兩燠也鳧氏之夢鼓鑄也陶氏之夢博埴也
梓人之夢斧斲也設色之夢丹青也此其常也帝
之夢築也築之夢帝也騎之夢舟也舟之夢騎也
囹圄之夢清都也清都之夢囹圄也此其反也常
者十而八九反者十而一二惟善惡亦然故曰夜

卜諸夢寐

生人有四死一水火死二盜賊死三鬪爭死四虐
政死然而虐政其甚矣秦皇漢武是也天下有三
劫一饑饉劫二兵刀劫三疾疫劫然而刀兵其甚
矣赤眉黃巢之亂是也

冬日不浴非愛水也為凜於膚也夏日不爐非愛火也為不適于體也榛莽之叢而獵者穿之虎豹不避利在山也萬頃之濤而漁者泳焉日夜不出利在海也故以耕釣之人視市朝則冬日之浴而夏日之爐也以軒冕之人視市朝則獵者之山而漁者之海也

羨藜不糾纏而曲篠蕩不䟽剔而直其本定也石可破而不可奪堅丹可磨而不可奪赤其性定也鵠不日浴而白鳥不日緇而黑其色定也盜蹠不可以為隨夷逢干不可以為庶來其德定也

湖上不鬻魚林中不貨薪以有餘也破舟而千金
一瓠絕餽而斗粟千緡值所乏也冬不接筭夏不
衣裘以非其時也山行不以舟水行不以車以非
其地也五音不奏於壘夫五色不呈於贖子以非
其人也

后稷為兒以種樹作戲仲尼能行弄俎豆為娛性
所生也楚澤之人善漁閩海之人善汨齊郡之女
無不工於刺繡襄邑之女無不工於織錦習使然
也物亦有之虎豹之生文章未成而有食牛之氣
鴻鵠之生毛羽未傅而有四海之志性也獼猴之

舞應節鸚鵡之語若人習也

君民一體也戚休同之矣故太平備物非極欲也
春秋遊豫非怠荒也樂民之樂也下有憂民則上
不盡樂下有饑民則上不備膳下有寒民則上不
具服非謙約也憂民之憂也

工師能為巨室而所蔭則草舍也輿人能為堅車
而終身則徒步也鳧氏能鑄金而室中之陳則土
缶也陶人能為什噐而汲取則敗甕也故曰為不
必用而用不必為役使群動兼制百物此大人之
事也

少言者不為人所忌以無傷於物也少行者不為人所短以無尚於人也少智者不為人所勞以無資於謀也少能者不為人所役以無濟於人也

天下可以無麟鳳不可以無馬牛可以無首柱不可以無菽粟可以無錦繡不可以無布帛可以無珠玉不可以無木石可以無甲兵不可以無禮義可以無藩屏不可以無紀綱

無魚而為魚罟無所用之魚至而為罟則無及矣未旱而為桔槔無所用之旱至而為之則無及矣未寒而為緇袍無所用之寒至而為之則無及矣

然與其後時也寧先時與其無備也寧過備
錦繡一也被於施媵則麗被於媢母則醜軒車一
也乘於卿士則榮乘於市傭則辱丹青一也施於
臺榭則華施於厠溷則褻珠玉一也飾於冕弁則
重飾於履屨綦則輕祿爵一也加於君子則貴加於
小人則賤

鬪而鑄兵無資於鬪渴而穿井無資於渴溺而後
問渡無救於溺迷而後問途無及於迷是以君子
貴於見幾而凡事敗於不豫楊時悔應蔡京之薦
許衡悔仕胡元之失此士人立節之不豫者也李

斯思牽犬之適五王悔三思之禍此人臣遠患之
不豫者也昭公悔於乾侯郭公悔於出亡此人君
保國之不豫者也

凡人之有所長也適以殺其身也非所長之能殺
身也有其長而恃之之殺身也故善游者死於水
善射者死於陣善搏虎者死於虎善捕蛇者死於
蛇善鬪者死於鬪善負重者死於負重此恃其技
而殺身者也善辯者死於辯善詐者死於詐善謀
者死於謀善說者死於說善術數者死於術數此
恃其智而殺身者也

鐘無槌而鳴不能明其非妖也木無火而然不能明其非恠也女不夫而孕不能明其非淫也士無才德而取富貴不能明其非倖也

處世亨困有天為之者有人為之者越人而為車則困燕人而為舟則困澤人而為斧斤則困山人而為網罟則困暑而貿裘則困寒而貿絺則困雨而為桔槔則困晴而為雨蓋則困此人為之也饑饉之灾殺民癘疫之行殺民水火之異殺民兵革之變殺民孔孟不得其位顏回不得其壽武侯不能興漢文山不能存宋此天為之也

人君之於臣尊爵以寵之厚祿以養之屈身降禮
以下之此非有骨肉之親也利在於安國家也人
臣之於君夜寐夙興竭忠宣力主憂與憂主辱與
辱此非有父子之愛也利在於立功名也何以明
之王良之於六馬也秣之芻之剔之爬之拊
之此非於馬有厚也利在於引車也醫吮人之傷
含人之血垢穢不避此非於人有戚也利在於取
貨也輿人成輿則欲其人之富貴情非愛人也人
不貴則輿不售利在人之富貴也匠人成棺則欲
其人之夭死情非憎人也人不死則棺不鬻利在

人之天死也

扁鵲見秦武王武王示之病扁鵲請除左右曰君王病在耳之前目之下除之未必已也將使耳不聰目不明君以告扁鵲扁鵲怒而投其石曰君與知之者謀之而與不知者敗之使此知秦國之政也則君一舉而亡國矣是故湯之謀也以伊尹高宗之謀也以傅說周武之謀也以呂望成王之謀也以周公宣王之謀也以仲山甫未聞人得間之也然易稱人謀鬼謀書言明目達聰非與曰謀不廣罔以盡物謀不審罔以執中若以非間是以枉

閻直是亡國之道也

唐睢有言曰事有不可知者有不可不知者有不可忘者有不可不忘者人之憎我也不可不知也吾憎人也不可得知也人之有德於我也不可忘也吾有德於人也不可不忘也虞陵子曰睢之言為信陵君言之也謂以讓功而固寵也然而有君子之道焉夫知人之憎則可以省愆矣憎人而人未之知則可以釋憾矣不忘人之德則不處其薄矣忘己之有德於人則可以去矜矣此所謂君子之道也

人莫不有癖亦莫不有醫司馬相如有文癖楊雄
有玄癖杜預有左氏癖左思有賦癖郭璞有數癖
王濟有馬癖和嶠有錢癖王子猷有竹癖梁簡文
帝有詩癖劉伶有酒癖阮籍有狂癖嵇康有傲癖
顧愷之有痴癖清濁不同其為癖一也好詩文者
醫以游藝好著述者醫以明道好玩物者醫以養
性好干名者醫以務實好貨貨者醫以廉恥好進
取者醫以義命多欲者醫以喪生好酒者醫以亂
性偏僻者醫以中和放誕者醫以修檢難易不同
其于治病一也

楚龜所以決疑也凡人之心則莫不有著龜也則
天象地軌與塊然一物乎神靈變化孰與枯草死
骨乎養其是非之心則莫不知焉全其耳目之聰
明則莫不聞莫不見焉今以己之神智不能決疑
而謀之於人以人之神智不能決疑而盡聽之於
卜筮不亦愚乎或曰箕疇著於書大衍著於易其
他徵於傳記者蓋班班也而謂可小之與曰易之
人謀先於鬼謀書之稽疑先於卿士庶人非以著
龜之能靈於人也

力謂命曰若之功奚若我哉命曰汝奚功于物而

欲比朕力曰壽夭窮達貴賤貧富我力之所能也
命曰彭祖之智不出堯舜之上而壽八百顏淵之
才不出衆人之下而壽四八仲尼之德不出諸侯
之下而困于陳蔡殷紂之行不出三仁之上而居
君位季札無爵于吳田恒專有齊國夷齊餓于首
陽季氏富于展禽若是汝力之所能柰何壽彼而
夭此窮聖而達逆賤賢而貴愚貧善而富惡耶力
曰若如若言物則若之所制耶命曰既謂之命柰
何有制之者耶或問于無營子曰夫二子者之言
何如曰命之非力非也力之非命亦非也夫修德

行義可以致貴勤生嗇施可以致富節性葆神可
以致壽此不可不力者也孔子之不得位顏淵之
不永年子桑之困原憲之貧此制于命者也君子
不以天廢人不以命弛力

火之將燼也其焰必高水之將竭也其流必駛木
之將敗也其實必繁鐘之將毀也其響必震物情
大抵然也惟人亦然目將眇者必睹秋毫耳將聾
者先聞蚋飛口將爽者先辨淄澠鼻將窒者先覺
焦朽體將僵者先亟奔佚心將迷者先察錙銖蓋
皆偏至之為反也故用其所有用非智也而不用

其所有用則智也以有用用愚也而強以無用用則愚之愚者也

或語於人曰吾將斬而嗣其人有不怒者乎或語於人曰吾將大而後其人有不喜者乎夫人知怒人之斬其嗣也而不知身自斬之也知喜人之大其後也而不知身自大之也可悲之甚也今夫火樹不可以樓湯池不可以泳以無所息也鄧林多材玄圃多寶以有所息也柰何世人之弗知也昔纘武子無一卒之田其官不備其宗器宣其德行順其憲則使發聞于諸侯諸侯親之戎狄懷之以

正晉國行刑不收以免於難及桓子驕秦奢侈貪
欲無執略則行志假貸君贖宜及於難而賴武之
德以沒其身及懷子改桓之行而修武之德可以
免于難而離桓之罪以亡於楚夫先人而善雖惡
猶可以倖免其鄧林玄圃之謂乎先人而不善雖
善不能保其宗其火樹湯池之謂乎

語曰同言而信信在言前同令而行行在令外故
詩有鼓鍾之喻易有鳴鶴之繇言乎其所感也是
故太王居邠苦于狄患杖策去之百姓扶老携幼
裹糧以從而邑於岐周非令之所能招也秦穆公

飲盜善馬者以酒韓之戰以其死力報非券之所
能責也宓子治單父巫馬期往觀化見夜漁者得
小魚即釋之非刑之所能禁也孔子為魯司寇道
不拾遺市不豫賈男女別于途斑白不負戴非法
之所能致也要皆有以先之者也

諺曰人不躓于山而躓于垤山大也故人慎之垤
小也故人易之今夫妻妾之燕私垤也宮室之隱
暗垤也親昵之交游垤也取予之細微垤也好惡
之遷易垤也尊俎之談笑垤也蹊徑之從違垤也
一有不慎能無躓乎

海翁有畜牛令人粥於市折而弗售翁曰為足不
矯耶體不碩耶力不勝耶耳目不聰明耶曰否老
其齒耳然則彼少壯者不逸韁踰畔乎而人爭售
之何也曰人情賤老而貴壯逸韁踰畔其甘也而
膚革改前齧芻如嚼鐵者非所欲也翁曰然則文
王之鬻熊武王之呂望秦穆之蹇叔何為而寶之
曰世無文王安知鬻熊世無武王安知呂望世無
秦穆安知蹇叔即賢也以其老棄者亦多矣何獨
至于今而疑之翁乃喟然嘆曰斯牛之不售也宜
哉其善飼之

湛盧不飾不售而鉛刀盛飾則售大黃不飾不售而散弭盛飾則售敦彛不飾不售而俗器盛飾則售綠綺不飾不售而時琴盛飾則售夫以偽物眩人者凡以網利也此人情也為偽物所欺而甘心焉非人情也徇其外而不責其實也其於人也亦然善兵者不用而抵掌以談兵則用善醫者不用而勦說以談醫則用為道學者不用而襲浮言以談道學則用懷經濟者不用而掠陳跡以談經濟則用無惑乎相率而為偽也夫物之眩人也止於亡金人猶惜之人之眩人也上之敗國家下之敗

風俗而當局者猶然甘之曾是以為智乎

飽而知足易未飽而知足難温而知足易未温而知足難富而知足易未富而知足難貴而知足易未貴而知足難蓋人能知足則無時不足矣反裘負薪帶索行歌莫非樂也不能知足則無時得足矣眉鳩之藏金谷之麗猶之為歎也

丐子而得珍羞不若粗糲之善飽也凍夫而得輕紈不若緇袍之能温也易粟於肆不若良田之可常穫也買薪於市不若叢林之可常樵也是以君子務其實不務其華求諸已不求諸人

人有言知慧之於血氣也如燈火之於脂膏也炷大而明明則膏消炷小而暗暗則膏息故與其明也寧暗與其消也寧息

或曰賢者不必貴而貴者不必賢勞者不必富而富者不必勞果天道乎曰賢而貴也勞而富也此天之有定者也賢不必貴也貴不必賢也勞不必富也富不必勞也此天之未定者也由未定故德薄而位尊功薄而享厚尸之若固有圖之如不及天下皆是也然釁積而禍叢猶之緼火蓄癰者也待時而發耳故曰斛滿而人概之人滿而天概之

可無懼乎

山居而谷汲者抱罍盎而相遺以水澤居苦水者買庸而決竇非於水有好惡也利害之情異也凶饑之歲兄弟不相饒豐穰之年䟽客亦必食非骨肉䟽而外人親也多寡之實異也為人上者誠能使貨泉若流水也穀粟常穰歲也則不施惠而民知惠不加罰而民遠罰矣

凡人之情莫適於無欲莫不適於有欲惟有欲也則得失薰於外水火戰於中晝而營營夕而憧憧求一息之休舍不可得也惟無欲也其視為天子

也與為輿隸同其視有天下也與無立錐之地同
其視為彭祖也與為殤子同夫其為天子也為輿
隸也有天下也無立錐之地也為彭祖也為殤子
也禍福之極致也且猶能安之而况其細者乎是
其適也羸之為適也其不適也多之為不適也

人有言曰龍食乎清而遊乎清石戶之農北人無
擇不受舜禪卞隨務光不受湯禪是也螭食乎清
而遊乎濁伊尹耕莘而應三聘之勤太公釣渭而
赴後車之載是也魚食乎濁而遊乎濁井求之事
季孫子路之死衛輶是也

魚無耳而能聽蟬無口而能鳴蛇無足而能行蚓
無筋而能縮菟絲無根而活此物生之異也死矣
以頸交鳩鴿以足交鶴以聲交鷺以目交騰蛇以
聽交孔雀鸛鳥以接影交蝴蝶絡緯蟋蟀以鬚交
鴉以過氣交鵲以傳枝交此物交之異也蛇化為
龜雀化為蛤朽麥化為蝴蝶山蚯化為百合此物
化之異也

惠子相梁莊子往見之或謂惠子曰莊子來欲代
子相於是惠子恐搜于國中三日三夜莊子見之
曰南方有鳥其名鷦雛子知之乎夫鷦雛發于南

海而飛于北海非梧桐不止非棟實不食非醴泉
不飲于是鷓得腐鼠鷓雛過之仰而視之曰嚇今
子欲以子之梁國嚇我耶玄冥子曰今之人其不
為鷓者寡矣身為宰而忌人之為宰也身為相而
忌人之為相也乃其人有操行則忌有才美則忌
有文章則忌陰為之阱而陽設之機惟恐勝己者
進而將不利於其躬也則何以異於得腐鼠而嚇
鷓雛者哉彼須賈之賊范雎田蚡之傾竇嬰又何
足怪也

事有同行而異情亦有同事而異效者竊戚之歌

也以干君也子桑扈之歌也以樂貧也秦穆飲盜馬以酒公其德也御者醉子反以酒私於愛也此同行而異情者也堯舜讓而帝之噲讓而絕湯武爭而王白公爭而滅此同事而異效者也

詩曰天之牖民如墳如篴如取如携故為善而得福天也為惡而得禍亦天也然天之福嘗加於袁宏樊重而不加於陳蕃竇武其禍也嘗施於韓休胄賈似道而不施於史彌遠秦檜何與曰此天網之恢恢也有至有不至也必一一而酬之則是市人之以貨交易而隣里之以酒食相報答也何言

乎天道哉

箕穎之樵牧天子不能遜之以位棘津之屠釣白首而都將相此貴賤之有定者也鄧通得倖漢文賞賜累鉅萬益之嚴道銅山得鑄錢通貨而卒不免於餓死陶朱公三困而三致封君之產此貧富之有定者也單豹養其內而虎食其外張毅勇於外而病蝕其內此生死之有定者也

彈塗

魚

懼人之見捕也必穿穴以自居人從其穴

而取之無弗得矣烏賊魚懼物之相害也常吐墨以自蔽人因其墨而取之無弗得矣狡兔三穴而

卒死於穴，猩羆罵酒而卒死於酒，故知有所不能周而患有所不可避。

人無於水鑑，當於事鑑；鑑於水可以知好醜，鑑於事可以知善惡。何以徵之？昔樂羊為魏將而攻中山，其子在中山，中山之君烹其子而遺之羹，樂羊坐於幕下而食之，盡一杯。文侯謂堵師贊曰：「樂羊以我故而食其子之肉，答曰：『其子而食之，且誰不食？』」樂羊罷中山，文侯賞其功而疑其心。孟孫獵得麇，使秦西巴載之歸，其母隨之而號。秦西巴弗忍而與之，孟孫歸至而求麇，答曰：「余弗忍而與其母。」

孟孫大怒逐之居三月復召以為其子傅其御曰
曩將罪之今召以為子傅何也孟孫曰夫不忍于
麇又且忍吾子乎故曰巧詐不如拙誠樂羊以有
功見疑秦西巴以有罪益信鑑于事之謂也

士君子之處世莫善於介莫不善於無介介者界
也所以畛域其身者也辟之江河之汎濫也介其
水之防乎草木之蕃殖也介其圃之樊乎故介則
為防為樊即有不合於中庸非惡也不介則毀防
決樊將無所不至矣故晨門荷蓀接輿耦耕之徒
與世判不相諧隘亦甚矣夫子無譏焉而獨以卿

愿為德之賊。至比於鄭聲利口而惡之。為其足以亂視聽而移心志也。世之人不以為戒而反以為法。不惟病已。亦以病人。如陳萬年教子。咸以諂賊其子者也。柳宗元勉楊誨之。以圓不愛其友者也。婁師德戒其弟。以拭唾面不成。其弟者也。

事有似是而非者。伍子胥鞭平王之尸。以報父讎。欲以為孝也。不如無孝焉。倉梧丙娶妻而美。以讓其兄。欲以為悌也。不如無悌焉。吳季札守曹子臧之節。讓國于公子光。卒亂吳國。欲以為節也。不如無節焉。宗魯受齊豹之謀而死。孟縶之難。欲以為

義也不如無義焉鮑焦餓而食山中之棗或問其所種遂嘔吐立枯而死欲以為廉也不如無廉焉尾生與女子期於橋下水暴至不去而死欲以為信也不如無信焉故名有所不可慕而行有所不可過君子亦惟蹈夫中庸而已

齊景公為晏子之貧使吏致千金與市租請以奉賓客晏子辭曰嬰之家不貧以君之賜澤覆三族延及交遊以振百姓君之賜也厚矣嬰聞之厚取之君而施之民是臣代君君民也忠臣不為也厚取之君而不施于民是為筐篋之藏也仁人不為

也進取于君退得罪于民身死而財遷於它室是
為宰藏也知者不為也再拜而不受今有為相者
以佞諛蠱君寵祿日富賞賜數十萬猶未厭也挾
朝廷之威福以網天下之苞苴累十而百累百而
千累千而萬傾四方之百物而納之私藏金玉玕
玩積如丘山雖眉塢之藏不是過也未幾天怒人
怨家錄子誅而所有盡歸於公府且併其祖先之
遺而亡之然則晏子之言豈不為永鑒哉

君子之行不必其同不必其不同惟其是而已猶
之五音異聲要之成樂焉耳五味異齊要之成饌

馬耳應劭有言曰伯夷讓國以採薇展禽不去於
所生孔丘周流以應聘長沮隱居而耦耕墨翟摩
頂以放踵楊朱一毛而不為干木息偃以藩魏包
胥重璽而救荆夷吾朱絃以三歸平仲辭邑而濯
纓惠施從車以百乘桑扈徒步而裸形甯戚商歌
以下祿顏闔踰墻而遁榮高柴趣門以避難季路
求入而隕零端木結駟以貨殖顏回屢空而弗營
孟獻高字以美室原憲蓬戶而株楹故易記斷金
書稱九德非必其同之謂也

漢武帝命騶官簡徒御將獵于上林東方朔請問

曰聞陛下將出獵乎帝曰然則曰臣未知陛下之
獵也以禽乎抑以士乎帝曰士亦有獵乎朔曰有
之昔周文王將獵渭濱卜之其繇曰非熊非羆所
獲聖王之輔文王曰獵而得輔利孰大焉遂以如
畋得尚父而歸此以士獵者也太康畋于有洛之
野十旬弗返穆王使造父御八駿之乘周流天下
所至弋獵樂而忘歸此以禽獵者也夫士之伏于
山林也猶禽之蕃于藪澤也惟上所以獵之故仁
義以為網禮樂以為羅玄纁玉帛以為罝畢辟命
以為弓矢獵得佩道懷德之士則騶虞也獵得謀

王斷國之士則祥麟也獵得觸邪逐佞之士則神
獬也獵得文章藻麗之士則靈鳳也獵得斬將降
王之士則魁靡也獵得靖邊捍圉之士則熊羆也
獵得和民撫衆之士則犀象也若是者十得六七
而王十得四五而強十得二三而安孰與麋鹿麇
豸之獲鷹隼雉兔之收徒以膏鼎釜薦豆籩充賓
客燕享之娛哉陛下今茲之舉亦將何所從事乎
帝曰子大夫之言善矣朕今且為從禽之獵如其
獵士乎異日者當與子大夫更圖之

物有賤而可貴草木之於醫藥是也有貴而可賤

玉卮之滿不可以盛水是也人有賤而可貴匹夫
可以相天下是也有貴而可賤四友之臣不足以
安國家是也何以明其然也昔者湯將往見伊尹
令彭氏之子御彭氏之子半道而問曰君將何之
湯曰將往見伊尹彭氏之子曰伊尹天下之賤人
也君若欲見之亦令召問焉彼受賜矣湯曰非汝
所知也今有藥於此食之則耳加聰目加明問之
則一草之本也亦將棄而不食乎今夫伊尹之于
我國也譬之良醫善藥也而子不欲我見之是子
不欲吾善也因下彭氏之子不使御於乎世無成

湯安知猷畝之夫之貴乎

論者曰不井田不封建不肉刑不足以復三代之治此泥古之見非通達治體之言也夫汙樽杯飲不可行於簞盥盥豆之世茅茨土階不可施于清廟明堂之間惟其時而已如欲必井田也則將盡夷宮室墳墓而為之乎必封建也則漢諸侯王之禍不可鑒乎必肉刑也則秦政商鞅之虐足師法乎誠能厚生利用征歛以時則井田可無行也六服群辟承德藩衛周嚴則封建可無用也法令章明五疵不入則肉刑可無用也

先王未施信於民而民信未施敬于民而民敬
衣冠而民不敢犯禁以有先之者也德之衰也方
徙木之信信不足也嚴齒輅之誅敬不足也用參
夷之法禁不足也

賢之能存人國也猶醫之能理病也病不能延明
醫而惟庸醫之為聽及病之不治也則曰醫固不
足以愈疾也國不能用真賢而惟不賢之為聽及
國之危亡也則曰賢固不足以存國也豈不諺哉
使唐明皇不用李林甫楊國忠則必無馬嵬之窟
德宗不用盧杞裴延齡則必無奉天之幸宋徽宗

不用蔡京童貫則必無五國城之幽

有唐堯之帝不可以無巢由之隱有周武之伐不可以無夷齊之諫有微子之去不可以無比干之死無巢由則貪位慕祿者皆是矣無夷齊則弑君篡國者皆是矣無比干則皆主偷生者皆是矣石不可以為玉而可以攻玉鉛不可以為金而可以範金小人不可以為君子而可以玉成君子舜之成聖也以象文王之成聖也以崇侯周公之成聖也以管蔡